

## **TIMOTINYI**

### **Paul gv Siti Lvnyinbv Jinam**

### **Mintamchonam**

*Paul gv Timotinyi siti jidvnam* si ninyia ridornv boru gubv mvngla minsarnam gaamv achialv yadu. Gaam gv alo jvngv saktv svnga mindu. Timotinyi hirukaya nga hinjeka okv nyi vdww nyiru bv rijeka tamsarnvbv okv ebenjelist akobv ninyigv ridung nga rila Jisu Kristo gv kaalwkbv rila Alvnnv Yunying gvla okv Aku Pvbv gv jvrv nga minbvribv tvvlaka vla mintvmiru namgo.

Timotinyi vbv akusubv gamrw toku “Pvcha okv chimapamubv lardar minsu kolo” reming-dakming gvyoka vla vkv nvngv nyi gv lvgabv alvngobv rima, vbvritola bunua tvyakayanv nyi vdww gooyare.

So mvnwng sokv, Timotinyi siti sum lvknv gv rinamdaknam ha kaagv sila ka vtoku— ninyigv mvngjwng nga, saktv nga, paknam ha, okv mvd-wkmvku kolo hirukaya hinam a kaagv sitoka vla akusubv gamrw toku.

#### **Arwng lokv darlinnam**

Mintamchonam (1:1-2)

Hartv okv mintvmiru (1:3-2:13)

Tamsar okv gamrw (2:14-4:5)

Paul gv atubogv rinamdaknam (4:6-18)

Minyakunam (4:19-22)

<sup>1</sup> Jisu Kristonyi akin laikula milv kunam tur-nama ngonu paareku vla japgo modukubv Kristo

Jisu gvlo apostol gubv rikunv Paul gvlokv sum siti sum lvkdunv—

<sup>2</sup> Ngoogv aya kunam kuunyilo, Timotinyi:

Ngonugv Abu Pwknvyarnv okv Jisu Kristo ngonugv Ahtu nonua anyubv paknam ha, aya nga, okv sarsopoyo nga jigv yika.

*Umbonyikv vnam okv mintvmirunam*

<sup>3</sup> Ngoogv abuapa vdwgv rinam apiabv, ngoogv mongrumara lokv mvngdarsakdarla rijivngji kunam Pwknvyarnvnyi ngo umbonyikv vdunv. Ngo aluayu bv kumku lo nam mvngpala ngo ninyi umbonyikv vdunv. <sup>4</sup> Ngo no gv nyikla sarnam ha mvngpa dunv okv ngo nam kaanwng dukunv himpu hv ngoogvlo doolwk dukubv. <sup>5</sup> Ngo no gv alvbv mvngjwng nama mvngpa dukunv, no gv ayu Lois okv no gv anv Eunis ka vbv mvngjwng dootoku. No ka vbvridu vla ngo mvngjwkjwrwk dukunv. <sup>6</sup> Vkvlgabv ngo nam minpa jidunv vd-wlo ngoogv laak kv nam lakpo bvdw Pwknvyarnv nam anyubv amin jitoku ho jinam ha no turbwng molaka. <sup>7</sup> Vkvlvga Pwknvyarnv gv ngonua Dow jinamv ngonua busu gvdubv jima; vmabvya ninyigv Dow ngv ngonua jwkrw dubv, pakdubv okv atuv saktv sidubv mvy a dunv.

<sup>8</sup> Ngonugv Ahtu gv lvgabv ogu minse rise nga no hinyinghiru mabvka; okv Kristo gv lvkwngbv patwk doonv ngoogv lvkwng bvka ogu minse rise ngaaka hinying mabvka. Pwknvyarnv nam gwlvk ka jipv, vbvrila no Alvnv Yunying lvgabv hirukaya nga hindula no gv rise nga rilaka. <sup>9</sup> Hv

ngonua ringtoku okv ninyigv nyi vdwbv gok-toku, ngonugv rinam lokvma, vbvritola ninyigv mvngnam lokv okv anyubv aya lokv sum ritoku. Dw gv aatv madvbv Kristo Jisu gv lokv Pwknvyarnv ngonua ninyigv so anyubv aya nga jitoku, <sup>10</sup> vbvritola ngonua Ringjikunv Kristo Jisu gv aanam lokv um kaapa mopvku, hv sinam gv jwkrw nga ngoomu pvku okv gamlv ngv turnama kaatam duku.

<sup>11</sup> Pwknvyarnv nga Alvnv Yunying nga japgo kardu kubv apostol okv tamsarnv akobv tolwk pvkunv, <sup>12</sup> okv vkvlvkwngbv ngo svkvnv hirukaya nga hindukunv. Vbvritola ngo vjaklodvbv mvngtin bwdunv, ogulvgavbolo ngo yvnyi mvngjwng dudw um ngo chindu, okv ngo jvjvbv mvngdu hv ngam ogugo ridubv minpvdw ho Alu lobv nga ringla doolin more.\* <sup>13</sup> No gv kaaring sila riming gvnam lvgabv, ngoogv naa jvjvnv gaam tamsarnam vdwa rwkrwkbv gakbwng laka, okv Kristo Jisunyi akin laikula ngonu gvbv rikunv mvngjwng okv paknam lo doobwng laka. <sup>14</sup> Ngonu gvlo doonv, Darwknv Dow gv jwkrw lokv nonua ogunvgo minpvkudw hoogv alvnvnga vvpv laka.

<sup>15</sup> Pigelus okv Hermogenes bunyia mintala, Asia mookugv nyi mvnwngngv, ngam topak kunam ha no chindu. <sup>16</sup> Pwknvyarnv Onesiporus gv vpin ha aya kaatam runglaka, ogulvgavbolo hv ngam awgo mvngpu dubv mvtoku. Hv ngam patwklo doopv vla hinying mato, <sup>17</sup> vbvritola vdwlo nw

---

**1:11** 1Tim 2:7 \* **1:12** nw ngam ogugo ridubv mimpv kudw; Vmalo ngo ninyia ogugo ridubv mimpv kudw

Rom lo aachi tokudw, nw ngam mapama lodvbv makar toku. <sup>18</sup> Pwknvyarnv ho Alu lo ninyia aya jilaka! Okv no alvbv chindu Epesus lo hv ngoogv lvgabv achialvgo riji toku.

## 2

### *Jisu Kristo gvlo bivmanv Sipai*

<sup>1</sup> Kristo Jisu nyi akin gubv rilaikula anyubv aya paanam lo, ngoogv kuunyilo nga, no gwllwk rungbvka. <sup>2</sup> Ngoogv nyi tvyakayanv vdwgv kaagialo tamsarla jago jiku nama no tvvpv kunv, ho tamsar nama no naalaka, okv ho vdwa nyi mvngging kunam yvbunudw kvvbi vdwaka tamsar nyula dunv ho vdwgvlo tolwk jilaka.

<sup>3</sup> Kristo Jisu gvlo no bivmanv sipai bv rila, hirukaya nga hindubv mvngto laka. <sup>4</sup> Sipai akonv alvbv kudungkua rikulo orto jiyany nyigam ha mvngpu dubv ridubv mvngla sipai rimanv kvvbinyi vdwgv kudungkua rinam apiabv rila riorichi madunv. <sup>5</sup> Jokkwsinv ngv ho gv pvbv nga tvvma bongv amina paanyu madunv <sup>6</sup> Rongo rinv yvvdw rongo nga raaibv rilwk dunv hv nvvkum rikunyi paatupaake bv baak go paarung dukunv <sup>7</sup> Ngo ogunvgo mindudw no mvngdi kaatoka, ogulvgavbolo Ahtu nam ho mvnwngnga chindu kubv mvre.

<sup>8</sup> Ngoogv Alvnv Yunying japi kunamv si, Dabid gv husi bv rikunv, sinam lokv turkurla gudung kunvngv Jisu Kristo, um no mvnggap tvvlaka. <sup>9</sup> Ogulvgavbolo ngo Alvnv Yunying nga jago dunv, ngo hirukaya dunv, okv ngo minggiolegionv nyi aingbv lvpia ngaaka gvdunv.

Vbvritola Pwknvyarnv gv gamchar vdwa lvpia lwkla vvpvma, <sup>10</sup> okv vkvlvgabv ngo Pwknvyarnv gv darkunam nyi vdwgv lvgabv ngo saktv dukunv, vkvlvgavbolo bunuka Kristo Jisu gvlo aanv ringlinbaalin nama paamu dukubv okv hv ngemanv yunglit ha naalwk duku. <sup>11</sup> Si jvjv bv minamv:

“Ngonu ninyia lvkobv sikubolo,  
ngonuka ninyia lvkobv turming gvreku.

<sup>12</sup> Ngonu saktv nama ribwng bolo,  
ngonuka ninyia lvkobv rigvdogv minggv reku.

Ngonu ninyia toa kubolo,  
hv ka ngonua toa tareku.

<sup>13</sup> Ngonu jwkjwkvrvk bv rima jeka  
hv jwkjwkvrvkbv ribwngnv,  
ogulvgavbolo hv atubongv mvvnyu lamadunv.”

*Mvnglwkkaalwk bv kudungkua rinv*

<sup>14</sup> Sum noogv nyi vdwa minpa jilaka, okv Pwknvyarnv gv kaagialo bunua gaam gv lvkwngbv padar minsu mabvka vla gamrw tolaka. Vbvrinamv ogu alvngobv rima, tvvvnkaanv vdwa alvmoma mvngdu. <sup>15</sup> No noogv lvgvlvma bv Pwknvyarnv gv kaalwk bv ridubv mvngla rilaka, kudungkua rinv gv ninyigv kudungkua nga hinying manv aingbv rilaka, Pwknvyarnv gv jvjvnv doin a lodataka bv japnv gobv rilaka. <sup>16</sup> Minyingmiru okv pvcha gaam raakulo adu tvvlaka, hvkvnvngv nyi vdwa Pwknvyarnv

gvlokv adu yaya modunv. <sup>17</sup> Vkvnv tamsar hv vb-  
 vridu ungv kaapanv ayakka dvmechekenv aingbv  
 ridunv. Nyi anyigo hvbv tamsar bongv Haime-  
 nias okv Piletus bunyi. <sup>18</sup> Bunu jvjvgv lamtv nga  
 kiyu lakula vbv mindu ngonugv turkurkunam mv  
 riro pvkunv vla minla, mvngjwngnv nyi vdwg  
 mvngjwng nga mvngrugoya modu. <sup>19</sup> Vbvritola  
 Pwknvyarnv gv hvngdwngnv lvngtung ngv vd-  
 wloka biv nyumare; okv hoka gamchar vdwa svbv  
 lvkpv: “Ahtu chindu yvvbunudw ninyi gvbvrinv  
 nga” okv “Yvv bunu Ahtu gv nyi bv ridunv vla  
 mindunv bunu rigakpanam a topak lakuka.”

<sup>20</sup> Naam namtv kolo pvchwng odung nvgwngnv  
 achialvdu: kvgonv raaji okv ain lokv mvnam  
 go, kvvbi vdww vsing okv takam lokv mvnam  
 go; kvgonv dinchinv kudungkua lo rinv dubv  
 okv kvgonv dinchimanv lo rinv nvdubv.  
<sup>21</sup> Yvvbunudw darwkbv risudaksu dunv, bunua  
 alvnlv lo rinv nvre, ogulvgavbolo bunu Ahtu gvlo  
 tolwk sila okv ninyigv dinchinv nyi bv rila alvnnv  
 kudungkua mvnwnglo rinv nvdubv ridunv.  
<sup>22</sup> Singchanvgv mvngnamsaknam ha topu tokuka,  
 okv tarwkbaak, jwkjwkvrvk, mvngjwngnam,  
 paknam, okv sarsopoyo nga ho vdwa paadubv  
 rikw laka, yvvbunudw haapok sin v darwk  
 dunv ho lvkobv Ahtunyi ridurkoodubv kooto  
 laka. <sup>23</sup> Vbvritola pvchabv okv chimapamubv  
 larmi sunam lo adu tvlaka; no chindu vkvnnv  
 yalung dunam lo gomwng dunv. <sup>24</sup> Ahtu gv  
 pakbu bv rinv, no yalung durung mabvka. No  
 mvnwngnga aya nvgobv rito laka, alvngobv okv  
 saktvnnv tamsar nvgobv, <sup>25</sup> nam nyirunv vdwa

minbwkmilo jitv rinyi damdv bv rilaka lvkonyika Pwknvyarnv bunua alvnnv dw nga jila mvngdin mola okv jvjv nga chimunam guka doolare. <sup>26</sup> Okv vbvrikubolo mvngbwk laikula bunua naatungla mvngwngbv riminnv Uyu gv amin mvnamlo aaku mareku.

### 3

#### *Ataranya Alu vdwv*

<sup>1</sup> Mvnggap tvvlaka ataranya alu vdwlo hirukaya yayabv rire <sup>2</sup> Nyi vdwv nabung nyareku, dvgum nyareku, goolingua reku, okv hartvbamtv sure; bunu nyarjitari re, bunugv anvabu minam ha tvvmare, nyi nga umbonyikv mvngnam kaaku mare, dormo rimanvbv rire; <sup>3</sup> bunu aya mvngpa kumare, hilok minsi namgo kaaku mare, meyem minsire, paminaami sireku, okv byokchare; bunu alvnnvnga kaanwng mareku; <sup>4</sup> Bunu gwngkup nvgobv rire, ritormintor nyuma nambv rire, okv goolinguala kaimvnsgure; bunu Pwknvyarnvnyi svnga himpukain yanga pakyare; <sup>5</sup> Bunu ngonugv dormo so gv jwkrw jvjv yanga toa gvrila, agumlo alvbv rinv aingjvbv rila kaatamre. Vkvnnv nyi vdwlokv adu tvlaka. <sup>6</sup> Bunu kvgonv nyi vdwgv naam lo vngre okv yvv nyimv vdwv atubogv rimur gv vge nga gvvdudw okv nvgwngnv mvngnamsaknam mv ninyia pula vnggvdukudw vkvnnv lvvkumanv nyimv nga chaatinkorbo nyadu. <sup>7</sup> Nyimv vdwv alu gv dwkia chindubv rikwdu vbvritola bunu vdwloka jvjv nga chinyu mato <sup>8</sup> Jannes okv Jambres bunyigv

Mosesnyi rinyingriru nam aingbv, so nyi vdwsj jvjv nga rinyingrirudu—nyi vdwgvg dumpto ngv adarapa kuma okv mvngjwnglo ajwkalak kuma nyanv. <sup>9</sup> Vbvritola bunu achialvbv adu jego vngyo mare, oguglvavbolo mvnwngngv bunua achialvbv pvcha nvgobv kaareku. Jannes nyila okv Jambresnyi vbvdvdv ritoku.

### *Minyabv Minsarkunam*

<sup>10</sup> Vbvritola no ngoogv tamsar kolo, ngoogv rekordokor, okv ngoogv turnam gv lvkwngbv mvngnamsaknam um no tvvmikaami gvdu; ngoogv mvngjwng nga, ngoogv saktv nama, ngoogv paknam ha, ngoogv himv nama, <sup>11</sup> ngoogv mvdwkmvku hinam ha, okv ngoogv hinchng chingnam ha no kaakitao pvkunv. No chindu vbv nga rikuv Antiok lo, Ikonium lo, okv Listra lo, hilvkumanam mvdwkmvku vdwa ngo himv pvkunv! Vbvritola Ahtu ngam bunugv lokv ringya pvkunv. <sup>12</sup> Nyichar mvnwngngv yvvbunudw Jisu Kristonyi akingobv rinvdaknvpv vla Pwknvyarnv jvbv turdubv mvngnv vdww mvdwkmvku nama paarung dunv; <sup>13</sup> alvmanv nyi vdww okv kupnv riapnv vdww abuyayabv alvmabv ribwng dvdvre, kvvbia kuplariapla rire okv atubongvka kupsu nyare. <sup>14</sup> Vbvritola nonua jvjv nga tamsarkinu pvkunv okv hvngdwngbv mvngjwng mopvkunv, ho doobwng dvdv laka, okv nam tamsarnv vdww yvvbunudw um no chindu, <sup>15</sup> okv no mvngpadu noogv vmi anga rilokv rila, no Darwknv kitap ha chimpvkunv, hv nam mvngkimvnglak ha jila nvngv okv



Jisu Kristonyi mvngjwng lokv ringlinbaalin lo vnggvnv. <sup>16</sup> Darwknv kitap mvnwnv si Pwknvyarnv gv saklwknamv\* okv si jvjv nga tamsar sarnvvnv, rimur ha yamvvnv, rigakpanam a rijwk nvvnv, okv tarwkbaakbv rinamdoonam lvgabv tamsarkinunv, <sup>17</sup> vkvlvgavbolo yvvdw Pwknvyarnvnyi rijivngjin v hv alvvnv ogugumvvnv nga rinam lvgabv mvpvripv sila riyin nvgobv ridukubv.

#### 4

<sup>1</sup> Pwknvyarnv gvla okv Kristo Jisu gv kaagialo, yv vkudw sinv ngala okv turnv vdwa jwngkadaka kujinv, okv oguglvgavbolo nw Dvbnv gubvrila rigvdogv tvbv aariku, ngo nonua dinchirungbv mintvmiru dunv <sup>2</sup> doin a japji laka, (japdw hv aadu lo aama dvlo) um no japbwng laka, mi-ayadubv, yamdin dubv, okv mintvmiru dubv, noogv ogumvvnv nga kvnwkrvkwk mabv tamsarnam jvbv japbwng jilaka. <sup>3</sup> Vkvvnv dw hv aariku nyi vdwv alvvnv doin ha tvvnvngv kumare, vbvritola bunu atubogv mvngkulo vngya reku okv bunu atubogv lvgabv tamsarnv kai yayago naakum reku hv bunu nwbunugv tvvnvngv ngv aakbriak nama minji moreku. <sup>4</sup> Bunu jvjv yanga tvvmabv mookor reku okv krim gv higuhirak yanga dinchi yabv tvvriare. <sup>5</sup> Vbvritola no atubongv svkvvnv adwkaku himpukain mvnwnv lokv naatung sulaka; hinchng nga himv sulaka, Alvvnv Yunying nga japjinv gubv ribvla

---

\* **3:16** Darwknv kitap mvnwnv si Pwknvyarnv gv saklwknamv okv si rinvnvdubv ridunv; Vmalo Darwknv kitap Pwknvyarnv gv saklwknam si rinvnvdubv ridunv.

kudungkua nga ritolaka, okv Pwknvyarnv gv pakbu gubv noogv risevngse mvnwnngnga rito laka.

<sup>6</sup> Ngo gvbvdv, siring jidubv dwv aaduku; nyiamooku so turla singnam sum topudw ngv si aapvku. <sup>7</sup> Ngoogv jokkwsise ngam ngo alvya-chokbv jokpv kunv, ngoogv jokse mvnwnngnga \*joknya pvkunv, okv ngo mvngjwng nga topak mato. <sup>8</sup> Rigumyala Pwknvyarnv gvlo tarwkbak kunamgv aminv ngam kaayadu, Ahtu, jvjvbw jwngkadaka yanv gv ngam ho Alu lo jiji kunamv—okv ngam mwngma, yvbunudw paknam gv lvkobv ninyigv aaku jinam ha kaayala doonv mvnwnng ngaaka.

### *Atubogv Gamchar vdvw*

<sup>9</sup> No ngoogv soka baapubv aagornam lvgabv lvgvlvma bv gwngto laka. <sup>10</sup> Demas nw vjakgv nyiamooku sum mvngbiu yalakula ngam topak roku, Tesalonika vngyu roku. Kresens Galatia bv vngroku, okv Taitas Dalmatia bv. <sup>11</sup> Luk mvngchik ngam lvkobv doodu. Marknyi paamisi-layila no lvkobv aagvlaka, ogulvgavbolo nw ngam kudungkua lo ridur nyure. <sup>12</sup> Taikikasnyi ngo Epesus bv vngmupvnv. <sup>13</sup> Vdwlo no aarikudw Karpasnyi lvkobv Troas lo ngoogv vngyu kunam vji laklwk ha bvnglwk jilabv; kitap vdwaka bvnglwk jilabv, okv apin lokv mvnam kitap anga dinchi yabvka.

---

\* **4:7** mvngjing dvdvaka; Vmalo ngogv milv naamv jvje wrong. **4:10** Kol 4:14; Pilem 24; 2Kor 8:23; Tai 1:4 **4:11** Kol 4:14; Pilem 24; Nyim 12:12,25; 13:13; 15:37-39; Kol 4:10; Pilem 24 **4:12** Nyim 20:4; Epe 6:21,22; Kol 4:7,8 **4:13** Nyim 20:6

<sup>14</sup> Alekjendar riokdar kudungkua rin v angv ngam hinchap namgo ripv; Nw ogugo ripv kudv Ahtu ninyia rirwk sire. <sup>15</sup> No ninyia atubongv hima sulaka, ogulvgavbolo hv ngonugv doin japriyi mintor ritor dubv achialv bv yalungy-achung bv ridunv.

<sup>16</sup> Atuake ho yvvka ngam ridummindumnv kaamato ngo atubongv mvnging sula risupv nv; mvnwngngv ngam toapagga nyato. Pwknvyarnv vkv nv hum kila bunua rinying mabvka vla kumdunv! <sup>17</sup> Vbvritola Ahtu ngam lvkobv dootoku okv ngam gwlvk a jitoku, vkvlgavv ngo doin ha kairungbv Jentail vdwa tvvdubv japgo nyulato; okv ngam sidukubv minbwk kunam a ringtoku. <sup>18</sup> Okv Ahtu ngam alvmanv mvnwng loka ringre okv ninyigv nyido Karv lo ngam ringchumriaila vnggvreku. Dvbvsingtambv yunglit namv ninyi gv bv doobwng yilaka! Amen.

### *Minyabv Kumrwklvtak kunam*

<sup>19</sup> Ngo Prisila nyila Akuilanyi okv Onisiporas gv vpin ha ngoogv kumrwklvtak ha jidunv. <sup>20</sup> Erastus Korinth lo doolwkro, okv Tropimusnyi ngo Miletus lo vngyu tvbv, ogulvgavbolo nw lvvmato. <sup>21</sup> Noogv lvgvlvma lokv rila svkar poolu hv kartv madvbv aadu bv rilaka. Eubulus, Pudens, Linus, okv Klaudia bunu kumrwklvtak ha jilwk nyapv, okv Kristan kvvbi vdwwka vbvdvdv bv jilwknyapv.

<sup>22</sup> Ahtu nonugv dow a lvkobv rilaka.

Pwknvyarnv gv aya ngv nonu mvnwngnga  
lvkobv reming gvlaka.

**ANWNV GAMLV**  
**Tagin first Bible translation based on TEV (Good News)**

copyright © 2018 The Word for the World International

Language: (Tagin)

Contributor: The Word for the World International

The New Testament in Tagin

Published as

**ANWNV GAMLV**

The Word for the World International

This translation is made available to you under the terms of the Creative Commons Attribution license 4.0.

You may share and redistribute this Bible translation or extracts from it in any format, provided that:

You include the above copyright and source information.

If you make any changes to the text, you must indicate that you did so in a way that makes it clear that the original licensor is not necessarily endorsing your changes.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

Note that in addition to the rules above, revising and adapting God's Word involves a great responsibility to be true to God's Word. See Revelation 22:18-19.

2023-08-23

---

PDF generated using Haiola and XeLaTeX on 13 Jul 2024 from source files dated 15 Apr 2023

65e96bca-33d6-5dc6-a8ee-da485ecfb7ed